



V E S E L I N M A S L E Š A

Veso je izgubio oko sasvim, sasvim slučajno. Bilo je go na početku školske godine u drugom razredu Realne gimnazije u Banjoj Luci. Veso je stajao pred školom i nešto čitao. U jednom momentu pozvao ga je Slavko Lastrić. U trenutku kada se Veso okrenuo na tu stranu, udario ga je kesten direktno u oko. Naime, Fadil je baš u tom momentu šutnuo kesten koji je pogodio Vesu.

Fadil i Veso bili su nerazdvojni školski drugovi. Uzajamno su se posjećivali i stalno družili. Slučaj je htio da zbog najboljeg druga Veso izgubi oko.

Nakon pregleda oka, ljekar, mislim Bukinac, upućuje Vesu u Zagreb. Iz Zagreba upućen je na kliniku u Grac, gdje je ostao šest mjeseci.

Vratio se kući u Banju Luku. Na oku se anatomski nije ništa primjećivalo, ali je izgubio vid na desno oko. Zjenica se proširila po cijeloj šarenici. Često mi je znao reći, onako uzgred, ako se razgovor odnosio na vid: "Mi zajedno imamo dva dobra oka, ja jedno, a ti drugo!"

Ono što se dogodilo Vesi duboko je potreslo Fadila Maglajlića. Oni su i dalje ostali nerazdvojni drugovi. Veso je bio vjenčani kum Fadilu kada se ženio sa Danom.

Tek tada je Veso rekao mami kako je došlo do toga da je izgubio oko. Nije htio da kaže mami da je Fadil šutnuo kesten, a vjerovatno je i ubjedjivao Fadila da on to sam ne učini. Fadil je, inače, bio stalni gost naše kuće, a njih dvojica su bila kao braća.

Kao djak Veso se počeo zabavljati sa Maricom Šalić, ali se ona mami nije svidjela. Bila je protiv njihove veze. To je bio jedini slučaj neusklađenosti i spora između naše mame i Vese. Veso je mami obećao da se neće više zabavljati sa Maricom Šalić. Kao i uvijek, obećanje je održao.

Banja Luka, 11. aprila 1974.-


(Seka Masleša)